

民國賓川縣志稿

藝文三

民國賓川縣志稿

藝文三

鄒公祠堂記

蘭谷鄒先生之得配於賓川以平積寇功也往者錢索箐
赤石崖饗夷憑恃險阻曠野弗馴自洪武底定滇中迄隆
慶垂二百年未之向化狼吞豺噬戕害生靈靡有寧歲當
路者為之調軍建衛增糧置禦而武吏戍卒莫敢櫻其
鋒先生鎮撫于滇赫然震怒提兵直擣其巢擒酋長羅勤
快等斬首以千計首尾決旬操鏡悉平厥功偉焉郡人李
元陽為之記鑒於石此州人所習聞也余則嘗讀其彈文
欣慕其人久矣當先生之在臺諫也嚴嵩專國其子世蕃

驟登卿貳竊法弄權中外切齒自楊海諸公被陷後無復
有言者先生獨奮然効之曰世蕃憑藉父勢擅爵賞納賄
遺市道公行為之關節者不下百輩而伊子錦衣嚴鵠中
書嚴鴻家奴嚴年為甚過嵩生辰年輒獻萬金為壽一介
僕隸尊大富侈如是則主人其何如耶尤可異者世蕃遭
母喪上以嵩年老特留侍養令其子鵠扶襯南還世蕃名
雖居憂宴狎客擁姬侍妙舞高歌日以繼夕已為鬼神所
厭扶其一目至鵠本豚鼠無知習聞穢視祖母喪為奇
貨騷擾道路百計需索往返所經諸有司悉望風趨承郡

邑為空則世蕃威福大盛之所煽赫也今水旱頻仍民窮
財盡莫可措手正由其父子貪婪無度掊剋日棘四方小
吏莫不竭民脂膏剝民皮骨以償買官之費民安得不貧
國安得不絀災警安得不疊至也疏入嵩致仕歸世蕃即
底坐烟瘴充軍鵠等戍邊年錮於獄人心為之一快於乎
先生之風若此即其智勇可知已其在朝廷而能驅除奸
佞者此智勇也在封疆而能剿滅寇殘者亦此智勇也余
刺是州謁先生祠讀紀功之碑益深仰止既以釋奠禮告
諸先聖祀於學宮復葺其宇新其遺像援先生彈文以為

之記俾州人士知先生生平骨鯁有古大臣風非僅區區武功而已也先生諱應龍字廣陵號蘭谷秦之西安人

重修江股攬溪橋碑記

州之西北不二十里曰江股村村有長洲其水發源於觀音箐所謂五溪者由陀羅疋穿金銀甸遠村而流東又納九大河直達金沙江此江股之所由名也天啟中州守蔣公爾第建駟馬通橋既圯屢葺而厥功未訖涉者蹇裳而濟頗以為病康熙辛巳里人李乘龍者損貲重建更其名曰攬溪勒其緣起於石至於今星紀載周以積雨水暴至

橋復壞乘龍之孫蔭廷余所拔士也貧而有志不忍其祖
貽澤之廢墜也殫力修築余行部過之再拜而請曰此蔭
廷先祖之所構也今重修之舊有碑殘缺不能復識矣願
乞一言記之余惟古之君子論譔其先祖之美而明著之
後世者禮也蔭廷有焉且徒枉輿梁王政之所重也在
今日則為有司之事矣蔭廷不憚經營之瘁而新之其弗忘
先祖之貽澤而實有裨於有司之事矣余故樂為書之俾
刻諸石有聞于後云

祭赤龍溪文

周 鉞

水不在深有龍則靈斯言也吾嘗誦之云爾今觀於黑樹
龍潭而益信潭分上中下三溪又名赤龍溪蓋赤龍之所
蟠潛也在乎疇斷岸之間左右無高山大川以為之發源
迴湫又非巨浸可以滄瀾漫演其實潢汙積潦荇藻填淤
已耳而每至農時資其灌溉者二十村非有神物隱伏焉
以惠我農人何能然哉田畯祭之必虔有以夫余領是州
於茲三播谷矣前兩年春來祭獲微其異其水從底出累
累如貫珠去其蘩莢塗泥即流而弗竭人爭浥淫是以定
有水班弗敢棄也又當夏旱余禱之同日得霖雨於乎何

其靈也抑又聞昔者州人士感神之惠為宮於溪潭之上
以殷祀事而神弗之取與雷雨以罷之于是僉謂神之廉
弗欲煩民也然則神之在淵在田施其膏澤為萬物資始以
輔相乎乾元者其合於君子之自強不息溥美利於不言
為何如哉使受朝命以字其民者皆如神之有惠於斯人
而弗之取則手足胼胝之氓不既長保其富庶矣乎此神
之所以不可及而余所古蠲以承其事者也茲者東作既
興疏道斯亟宰牲醑酒伐鼓合眾告虔於神而余為迎神
侑神之詩以樂之其辭曰

黑樹兮龍潭赤龍兮蟠潛水不深兮可探如貫珠兮吐揚
今一疏導兮澤汪汪

載曰其源也濺濺其流也澍澍沾溉我田兮惠蒼黔德施
普兮靡所貪人所饒兮神獨廉

亂曰威神兮至誠神之廉兮民所堪彼取民兮何知慙惟
我與神兮不與爭毫纖聽我歌兮樂其湛于茲水兮永汪
淹福我民兮功可劉

賓川曾節婦趙氏旌門頌有序

旌門之典即古表厥宅里樹之風聲之制也而旌門之有

頌則自近代文章家載其事以垂訓於世使人觀感而興
起故君子有取焉賓川節婦趙氏監生曾祖之妻也祖曾
祖高捷前吏部驗封清吏司員外郎祖化龍光祿寺丞考
學祖舉人今丁酉舉人揀選知縣宗傳其從子也本宗聖
裔其先自江西遷於此者而氏實學祖同年生保山縣儒
學教諭趙州趙鑄之女於內則者也年十八于歸二十而
立孤守節茹荼攻蓼誓死靡他而且服事其舅姑生養卒
葬禮無闕遺又鞠其夫之幼弟二人自孩提至有室而後
已有昌黎嫂鄭氏之風以未亡人而代所天克殫其孝乎

友于之職豈非常情之所尤難能者哉今撫其孤德承已
長能屬文矣鉞守土於茲鄉人陳其狀往返覆覈凡三請
而後得今吏部尚書總督部院仍管雲南巡撫事加六級
紀錄三次江陰楊公彙題制可者七人而氏居其一於是
符下布政使司發帑金三十令建坊旌表之既訖書其事
并作頌碑鑲諸石其辭曰於惟宗聖吾道之傳支分魯國
所在多有大江之西南豐最盛惟我賓川亦其子姓挹彼
注茲有美發祥大科奮迹為尚書郎繼起克昌承乎光祿
厥嗣登雲士林推轂吁嗟上舍弱冠云殂撫似育似賴此

孀婦民彝有常天咫弗遠甲令既符鄉評斯重

今皇御宇渙宇絲綸崇獎貞節不憚咨詢撫臣禮臣以疏
以儀

帝曰俞哉旌宜如制烏頭綽襖銀牌漆書女宗高行輝耀
州閭頽俗可風栢舟是式汗青可垂跡以樂石

皇清恩拔進士例贈修職郎諡文達六十壽朱老先

生墓誌銘

進士楊 淮撰

朱老夫子諱其紳字端甫性孝友立品芳潔嗜古好學受
經於前明經建翁王老先生善屬文清真純雅有先正遺

風冲年採芹輒試冠軍食廩饒越辛酉督學孫公賞其文
行特選拔冠多士陶鎔昆季一時綴巍科者凡二接踵膠
庠者十有餘人先生不以人文鵠起稍隳驥足仍率諸弟
授生徒絃誦不輟制行益勵意作南溟之鵬負青直上奈
屢躋棘闈不獲一第先生常以為憾繼乃退處林下志在
聞來境內英奇望門牆執弟子禮者類皆登賢書採芹食
餼彬彬稱極盛焉癸未春州憲崖廖公景仰道範延為筆
山書院長問字請業如初嗚呼我先生雖不獲廣教鵞湖
而英才之盛成就之多即使躬膺仕籍其造士作人寧有

加諸乃是歲七月二十二日先生倏以易簀聞羣弟當皇
遽中既殮且畢今且營葬東園祖塋羣相語曰先生行事
教人有功吾黨應誌以垂不朽嗣君之本辭以高祖拔儀
公由崇禎己卯科舉人歷任湖廣主事諧六公由康熙壬
午舉人歷任石屏學正伯曾祖左儀公由歲進士司鐸祿
豐叔祖澄菴公由歲士亦廣文石屏皆未有銘吾父何敢
衆瞿然曰誌我先生正以誌尊祖諸老先生者在後儀公
值多故時不事權勢大節凜凜名勒郡乘左儀公因心孝
友篤厚宗祧諧六公澄菴公喬梓濟美化被屏陽有諸先

生作世德於是春元繼續歲薦聯綿巍乎樹我賓之望復
有吾師以步其後所謂繼武前徽裁成後學者安知不又
厥裔之蔚然昌哉先生生於康熙壬辰年七月二十二日
申時先生父庠士諱德祚母朱氏前州刺史公諱夢雷孫
女歲進士公諱岑女舉子二先生行一胞弟應貢生諱其
斐先卒先生元配侯老師母庠生諱能一公女舉子一之
本業儒娶董公諱裕舒女現任易門縣訓導諱又舒姪女
舉女三長適庚辰科武孝廉姚公諱開虞次適舅氏侯公
諱德崇長子王適國學生張公諱其特長子同門諸友讓

序於予予不敢以不敏辭薰沐而為之銘曰世科濟美望
重賓陽蜚聲藝圃拔幟文場風清馬帳雪立程堂舊貂既
續雲路孔張勒茲貞珉以誌不忘肇啟賢裔寢熾寢昌

重修步雲橋碑記

邑人李蔭華撰

步雲橋者周官營大河之輿梁也襟帶霞城跨臨納水地
當孔道揄匡鵠永共此遠征溪納衆流寒玉鍾良於焉交
匯言交通則牛井各鎮之往還論形勢則賓居平川之關
鍵是謂要津宜乎通濟故昔之人聚石為碕支木作梁見
中谿太史之篇霞客寓公之記蓋明嘉萬以來曾剏修而